

Kantonees

Van Wikipedia

Dit artikel is gesjreve (of begós) in 't Mestreechs. Laes hie wie v'r mit de versjillende saorte Limburgs ómgaon.

't **Kantonees**, ouch wel **Yue-Chinees** geneump, is ein vaan de hoofdialekte vaan 't Chinees, gesproke in zuielek China. Wie bij de aander Chinese hoofdialekte kin me 't hiel good es 'n apaarte taol zien, umtot 't zier sterk vaan aander soorte Chinees versjèlt en neet demèt oonderling verstaanbaar is. Um politieke en cultureel reies weurt 't Kantonees toch es e dialek gezeen: de sprekers zien Han-Chineze, zjus wie de sprekers vaan 't Mandarijn en aander soorte Chinees.

De gemeine naam *Kantonees* kump vaan de stad Kanton (*Gwanzhou*) in Zuid-China, 't cultureel middepunt vaan 't taolgebied. Heidoor is de nomenclatuur neet gans dudelek: sommege verstoon onder *Kantonees* allein d'n tóngval vaan Kanton en neume de ganse dialekgróp *Yue*, aandere gebruke 't begrip *Kantonees* veur de ganse dialekgróp en neume de taol vaan Kanton *Standaardkantonees*. De lèste optie weurt in dit artikel ouch opgevolg.

't Kantonees zit wat status betröf tösse volkstaol en cultuurtaol in: 't gief (wie gezag) 'ne standaardvörm, 't weurt soms officieel gebruik (veural moondeling) en vrij dèks opgesjreve. Gesjreve Kantonees kint 'n aantal karakters wat in 't Mandarijn gaaroet neet weurt gebruik. De ISO 639-3-code is yue. De taol had in 1984 nao sjatting 56 mieljoen sprekers. Inheims is ze in groete deile vaan de provincie Guangdong, in Hong Kong en Macau; groete migrantegemeinsjappe (de zogeneumde *Kantonesen diaspora*) leve in Vietnam, Maleisië, Singapore en de Vereinegde Staote; ouch de Chineze in Nederland zien vaanajds Kantoneestaoleg.^[1]



Verspreiing vaan 't Kantonees in China.

Inhawd

Historie

Oonderverdeiling

Status

Klaanklier

Beginklaanke

Oetgeng

Toene

Grammair

Gesjreve Kantonees

Karakters

Historie

De historie vaan 't Chinees in de regio begint mèt de invasie vaan Chinese leger in d'n tied vaan de Qindynastie, aon 't ind vaan d'n daarden ieuw veur Christus. Tot daan touw waor dit gebed bevolk gewees mèt zoegeneumde Baiyuevolker, die 'n oonbekinde taol spraoke. Wat mèt die lui is gebäörd, wèt me neet perceis, meh in eder geval kaome (Han-)Chineze dao massaol woene en naome hun taol, 't Aajdchinees, mèt.

Tot aon d'n tied vaan de Tangdynastie - rouw-eweg de zevenden tot en mèt de negenden ieuw - bleve de versjèlle tösse de Chinese dialekte te euverzien; mèt 't Middelchinees vaan toen moot me ziech zoewel in noord es in zuid good verstoonbaar höbbe kinne make. Tenaov evels raakde 't zuie vaan 't land geïsoleerd vaan de machsbasis in Peking, en dewijl ziech dao 't Mandarijn oontwikkelde, behele de zuieleke dialekte vööl awwerwètse trèkke (zoewie plosieve es indklaank), dewijl ze zelf wel aander veranderinge doorveurde. Zoe woorte ze veer toene vaan 't Middelchinees deils opgesplits. Al deen tied waor de positie vaan 't dialek oonbedreig, neet allein door de maotege communicatie mèt Peking, meh ouch doortot de gesjreve cultuurtaol Klassiek Chinees bleef.

Wie de Europeaone nao Oos-Azië kaome, leet allein Kanton de boetelandsen handel touw. Daorum riechde ziech de blik vaan 't weste op die stad. Westerse handelere die Chinees lierde, riechde ziech neet op Klassiek Chinees of Mandarijn meh op Kantonees. Me zuut deen invloed bevrbeeld nog in de westerse naam veur de hoofstad, *Peking*: dee leit ziech neet aof vaan 't Mandarijn *Beijing* meh ieder vaan 't Kantonees *Bak1 king1* (spreek oet *pakking*). Dat gaof 'nen iersten aanzat tot Kantonees es prestiesjdialek. Ouch waor 't zjus oet dees stad tot in de negentienden en vreug-twintegsten ieuw versjèllende Chineze migreerde nao aander len in de regio of nog wijer eweg.

De val vaan 't Keizerriek (1911) maakde de weeg vrij veur 't aofsjaffe vaan 't Klassiek Chinees te geunste vaan 't Mandarijn es officieel taol. Sindsdeen waor 't Kantonees oondergesjik. Decennialaank - zeker ouch onder Mao - streefde me sterk denao um de standaardtaol everal in 't land in te veure. Aon d'n aandere kant kraog 't Kantonees in Hong Kong en Macau vööl beteikenis es de sprektaol vaan dao geproduceerde films en series. De lèste jaore is de hajding vaan de Chinese regering get coulanter.

Oonderverdeiling

't Kantonees liet ziech oonderverdeile in 'n aontal versjèllende dialek(sub)gróppe:

- Yuehai
 - Guangfu; hei-oonder valle ouch 't Standaardkantonees en de variante vaan Hong Kong en Macau
 - Tanka (Danjia), de taol vaan 't gelieknaomeg volk vaan zienomade
 - Sanyi
 - Zhongshan
- Siyi of Taishanees; vööl gesproke in de Vereinegde Staote
- Luoguang

- Gaoyang
- Guilin
- Yulin
- Nanning
- Wuzhou
- Beihai

De lêste vijf dialekte weure same wel Guinan geneump. 't Geit hei um 'n gróp relatief sterk vaan 't Kantonees versjèllende variëteite.

Status

Zoewel op 't vasteland vaan China es op Taiwan gelt 't Pekinees dialek vaan 't Mandarijn es de officieel taol. 't Beleid vaan de euverheid is drop geriech op dit Mandarijn te promote, zoetot me ziech in gans 't land verstoonbaar kin make. De dialekte höbbe geinen officiële status, meh ze weure neet structureel onderdrök (wie in Fraankrijk laank is gebäörd). Noe en daan kump e beriech binne euver lierlinge die straff kriege veur 't spreke vaan Kantonees, meh ech frequent is dit neet. Publicaties gesjreve in 't Kantonees weure algemeen touwgelaote en Kantoneestaolege films en meziek zien hendeg populair, neet allein in China meh ouch daoboete.

In Hong Kong en Macau is de situatie anders. De regering sjrijf allein veur tot de officieel taol 'Chinees' is, meh zeet neet tot dat Mandarijn moot zien. In de praktijk deent 't Kantonees dao in eder geval es officieel gesproke taol: in de regering en 't onderwies weurt miestes gei Mandarijn gesproke, al sjrijf me 't wel op.


Wie gezag leve vööl sprekers vaan 't Kantonees in Zuidoos-Azië en heet me dao touwgaank tot Kantonees gesproke popcultuur. Allein in Singapore weurt 't Kantonees actief onderdrök, same mèt de aander Chinese dialekte: umtot de Chinese gemeinsjap dao nogal heterogeen is, wèlt me door 't gebruik vaan de standaardtaol mier einheid smeie. 't Opebaar gebruik vaan Kantonees is verboje en de geneumde films en meziek zien neet te kriege.

Klaanklier


De Yue-dialekte zien oonderein hendeg divers en vaan ein klaanklier vèlt daan ouch neet te spreke. Toch kin de klaanklier vaan n'importe welk dialek 'ne gojen indrök vaan ze allemaol geve, in 't bezunder vaan de versjèlle tösse 't Kantonees en 't Mandarijn. Hei weurt de klaanklier vaan 't Standaardkantonees besjreve.

Beginklaanke

Wie bij alle Chinese dialekte weurt 'n syllaab opgebroke in beginklaanke en oetgeng of indklaanke. De beginklaank is ofwel 'ne consonant (mètklinker) ofwel 'ne nulklaank (daan begint de syllaab mèt 'ne vocaal; eventueel kin de nulklaank weure gerealiseerd es 'ne glottisslaag). In de Standaardkantonesen inventaris vaan beginklaanke oontbreke, zjus wie in 't Mandarijn, mediae (weike plofklaanke); me kint tenues (hel plofklaanke /p/, /t/ en /k/) en geaspireerde tenues (/p^h/, /t^h/, /k^h/). E versjèl is tot de Mandarijnse retroflexe (/ɭ/, /ʂ/, /ʈʂ/, /ʈʂ^h/) en palataole (/t͡ɕ/, /t͡ɕ^h/, /ɕ/) hei gans oontbreke. Wel heet 't Kantonees gelabialiseerde klaanke (/k^w/ en /k^w^h/) die 't Mandarijn weer neet kint. De *h* is in 't Kantonees weiker es in 't Mandarijn: mier 'n echte /h/ en gein /x/.



De Kantonees dialekgróppe.



Vocaole (klinkers) in 't Standaardkantonees. Sommege zien allofone; zuug de teks.

Oetgeng

Groeter evels zien de versjèlle bij de indklaanke/oetgeng. 'nen Oetgaank besteit dèks oet 'ne vocaol en 'ne consonant. De meugeleke aofsletende klaanke zien de haafvocaole /j/ en /w/, de liquidae /m/, /n/ en /ŋ/ zoewie de plosieve /p/, /t/ en /k/. Die plosieve en ouch de /m/, koume in 't Mandarijn noets in indklaanke veur. (Wäörd wie Kai2 Dak1 (vreuger vleegeveld vaan Hong Kong) en dim2 sam1 drage heidoor e typisch Kantonees stumpel; ze zouwe in 't Mandarijn *Qǐ Dé* respectievelik *dī ǎn xīn* luie).

Ouch de behandeling vaan klinkers is aandere. In 't Mandarijn kint me e groet aantal klinkerklaanke, die door taolwetensjappers tot vief foneme weure trökgebrach. 't Kantonees kint minder allofonie, meh wel ach klinkerfoneme. Zoe maak me in dees taol versjèl tösse /u/ ('oe') en /y/ ('uu'), dewijl dat in 't Mandarijn variante vaanein zien, die in de transcriptie ummer es <u> weure gesjreve. Ouch kint 't Kantonees, anders es 't Mandarijn, versjèl tösse lang en korte vocaole. Wel weure lang en korte vocaole dèks e bitteke anders gerealiseerd: 'n lang a klink wie /a:/, 'n korte a wie /ə/.

Soms höbbe syllabes gaaroet geine vocaol. D'n indklaank besteit daan allein oet /m/ of /ŋ/.

Toene

Vaan 't Kantonees weurt dèks gezag tot 't 'n aofsjrikwèkkend groet aantal toene heet; nege weurt dèks geneump. E bitteke oetlègk kin evels laote zien tot de situatie neet zoe gecompliceerd is wie ze liek.

De toene zien te verdeile in toene vaan ope syllabes en die in geslote syllabes. In ope syllabes zien zes of zeve toene meugelek, in geslote mer drei. (Twie traditioneel toene oet 't Standaardkantonees zien in modern variante, zeker in Hong Kong, goon samevalle; 't is op dit systeem tot de gaankbaar indeilinge zien gebaseerd.)

Toene in ope syllabes zien:

1. 陰平: hoeg vlaak (ˊ) of hoeg vallend (ˋ); twee toene in 't traditioneel Kantonees
2. 陰上: midde klummend (ˊ)
3. 陰去: midde vlaak (ˋ)
4. 陽平: lieg vallend (ˋ) of zier lieg vlaak (ˊ)
5. 陽上: lieg klummend (ˊ)
6. 陽去: lieg vlaak (ˋ)

Toene in geslote syllabes zien:

7. 上陰入: hoeg (ˊ; kump euverein mè 1)
8. 下陰入: midde (ˋ; kump euverein mè 3)
9. 陽入: lieg (ˋ; kump euverein mè 6)

De cieferkes zien in transcripties e.d. gebrukelek.

Grammair

De grammair vaan 't Kantonees heet mè 11 dee vaan aander Chinese dialekte veural euvereinkomste, meh ouch dudeleke versjèlle.

Wie alle soorte Chinees is 't Kantonees isolerend (analytisch), meh neet mie zoe strik wie 't Klassiek Chinees: zoe good wie 't Mandarijn en in tegestèlling tot de klassieke taol maak de taol gebruik vaan versjèllende suffices. Zoe weurt 't partikel 咁 (*-dei6*) gebruik veur 't miervoud vaan substantieve, wie in 't Mandarijn 們 (*-men*). In tegestèlling tot dat lèste kin 't Kantonees suffix allein nao wäörd veur zakes koume. Aander suffices of partikele (kwesatie vaan analyse) kinne nujeg zien um de woordsoort oet te make.

Wie 't Mandarijn heet ouch 't Kantonees zoegeneumde maotwäörd die nao tèlwäörd e.d. mote koume um de aard vaan de getèlde objekte oet te drökke.

't Werkwoord kin versjèllende tije en wijze hóbbe. Die weure door speciaal partikele oetgedrök.

De syntaxis vaan 't Kantonees SVO (oonderwerp - werkwoord - veurwerp), meh umtot de Chinese dialekte *topic prominent* zien, kin 't veurwerp good nao veure koume. Door 't oontbreke vaan naomvalle o.g.d. kin de beteikenis vaan 'ne zin daan dobbelzinneg weure; gemeinelek wijs de konteks evels oet wat of wee 't oonderwerp is.

Gesjreve Kantonees

Al in de late Qing-dynastie woort 't Kantonees opgesjreve, en wel in de zoegeneumde Kantonesen opera. In d'n twintegsten ieuw oontwikkelde ziech veural in Hong Kong, boe vööl lui gei Mandarijn kinne of kóste, 'n op 't Kantonees gebaseerde sjrieftaal wijer. De lèste decennia heet die 'n groete vlöch genome. Me zuut 't allewijl vööl op 't internet (chatboxe, sociaal media etc.) zoewie in pretentioes publicaties wie roddelblajer. In de riechsaol weure vaanajds al getugenisse gesproke in 't Kantonees lètterlek oet de moond vaan de spreker opgeteikend.

Karakters

Wienie 't Kantonees weurt opgesjreve in Chinese karakters, heet me globaal gezag twee keuze. De ierste keus is etymologische 'spèlling': me gebruik daan veur e Kantonees woord 'tzelfde karakter wat me veur dat woord gebruikde in 't Klassiek Chinees, en wat me nog ummer gebruik in 't Standaardchinees. In zoe'n gevalle versjèlt gesjreve Kantonees neet zoevööl vaan gesjreve Mandarijn en zien Kantonese tekste veur alle Chineze te begriep. Sommege wäörd, die in 't Mandarijn intösse verawwerd zien meh in 't Kantonees wijer leve, gebruke ouch 't bijbehurend klassiek karakter wat me in 't Standaardchinees neet mie kint. Ouch daan blijf 'nen teks veur d'n erudiete Chinees leesbaar.

De tweede optie is 'fonetisch spèlle'. In dat geval gebruik me veur 't Kantonees e karakter wat in de Mandarijnse oetspraak 't Kantonees 't bèste weergeef. In dat geval is 't vööl lesteger veur 'ne Chinees dee gei Kantonees kint um 'nen teks in die taol te leze.

Tot slot zien ouch 'neologistische' karakters in gebruik, die koelek veurkoume in aander dialekte. Zoe weurt 't woord *lip* 'lif', e lienwoord oet 't Ingels, wel es 嘔 gesjreve: 'n combinatie vaan 車 ('kaar', 'oto'; de lif bringk d'ch jammers nao 'n aander plaots) en 立 (*lap*, 'n fonetische benaodering).

Transcriptie

Wie 't Mandarijn weurt ouch 't Kantonees dèks in Latiense lètters getranscribeerd. 't Relatief groet belaank vaan 't Standaardkantonees maakde door de jaore heer de noed dao-aon ummer groet. Door zien aofwiekende klaanklier kin me evels neet veur allebei de dialekte perceis dezelfde fonologie gebruke. Toch hóbbe ziech bij zoewel Mandarijn es Kantonees versjèllende analoog veranderinge voltrokke.

De ierste wiedverspreide standaard woort in 1888 door Britse missionaire ontwikkeld; me spraok langen tied vaan de *Kantonese standaardromanisatie*. Hun systeem woort in de jaore 1920 en 1930 verbeterd door twee Oosteriekse missionaire, Meyer en Wempe. Dees systeme góngte sterk oet vaan bestaonde transcripties veur 't Mandarijn, wie de *Wade-Gilestranscriptie*. Kinmerkend is tot de spraokklaanke /p, t, k/ ouch weure gesjreve es <p>, <t> en <k>; de geaspireerde variante (zuug bove) weure mèt apostrofe gesjreve (<p'>, <t'>, <k'>). De lang vocaale, oonbekind in 't Mandarijn, sjreve dees twee geisteleke oet mèt dobbel lètterteikes (<aa> etc.). Zoe'n transcripties koume vööl awwer studente nog vertrojd veur; tot 1980 waore ze in de Westerse wereld gebrukelek.

De ierste transcriptie die economischer mèt 't Latiens alfabet umgóng waor de *Yaletranscriptie*, in d'n Oorlog ontwikkeld aon de gelieknaomege Amerikaanse universiteit veur soldaote die in de Oos góngte vechte. Typisch veur de Yalesysteme is tot me veur 't iers , <d> en <g> gebruik veur stumloes plosieve, zoetot me <p>, <t> en <k> kós goon gebruke veur de geaspireerde variante en de apostrofe euverbojeg woorte.

Dit systeem waor ummer nog relatief umslechteg, umtot 't bepaolde typisch Kantonese versjèlle neet maakde. De klaank [y] (*uu*) beveurbeeld, in 't Mandarijn 'ne variant vaan /u/ (*oe*), woort mèt <yu> weergegeve. Um zoe'n probleme op te losse ontwikkelde me 't Kantonees pinyin (1971, Volksriippubliek) en 't Jyutping (1993, Hong Kong).

Typisch aon dees systeme is tot de lètter <y> veur de klaank /y/ weurt gebruik, en de lètter <j> veur de klaank /j/. Mèt aander wäörd: de *j* weurt gebruik wie in 't Nederlands (en Limbörgs), dewijl in awwer transcripties vaan 't Kantonees (en bekans alle systeme veur 't Mandarijn) de *j* op z'ch Ingels weurt oetgesproke. Ouch opvallend is tot de toene nog ummer mèt cieferkes weure aongegeve (*Jyut6ping3*), dewijl 't Mandarijn-pinyin dao accentteikes veur is goon gebruke. Umtot 't Mandarijn mer veer toene heet en 't Kantonees zeker zès, zouw 't gebruik vaan accente in die lèste taol minder praktisch zien.

Bronne

Veur dit artikel is gebruik gemaak vaan de Ingelstaolege artikele Yue Chinese, Cantonese, Cantonese phonology, Cantonese grammar, Written Cantonese en vaan de apaarte artikele euver de versjèllende romanisaties.

Rifferenties

1. *Inspraakorgaan Chinezen - Het ontstaan van de Chinese gemeenschap in Nederland* (http://www.ioc-ch.nl/index.php?option=com_content&task=view&id=7&Itemid=20)

Extern links



D'r is 'n **Kantonese editie** van Wikipedia, de vriej encyclopedie.

Aafkomstig van Wikipedia, de Vriej Encyclopedie. "<https://li.wikipedia.org/w/index.php?title=Kantonees&oldid=426499>"

Dees pazjena is 't lèts veranderd op 14 mrt 2018, 12:39.

De teks is besjikbaar ónger de Creative Commons Naomsvermelding/Geliek Deile licentie. 't Is mäögelik dat aanvöllende veurwaarde van toepassing zeen. Betrach de Algemein veurwaarde veur mie informatie.